

KOMUNIKADO DI PRENSA
Dia 19 di yüni 2019.

Konseho di Konsulta ta splika den su relato anual di 2018:

Ku legislashon i kódigo di kondukta por limitá kasonan di konflikto di interes

WILLEMSTAD - Na 2018 43 petishon pa konseho a yega Konseho di Konsulta (Raad van Advies, RvA), miéntras ku e aña ei a saka 47 konseho, entre nan algun di e aña anterior. Pa fin di desèmber 2018 RvA tabatin 2 petishon so pendiente pa atendé. Asina por lesa den e relato anual 2018 di e kolegio mas haltu di konseho di pais Kòrsou ku tin komo enkargo prinsipal pa konsehá riba areglonan proponé. Komo tema di e edishon aki tin e tópiko aktual 'konflikto di interes den un komunidad chikí'. Miembro di RvA dr. Jeffrey Sybesma den un disertashon interesante a profundisá riba e tópiko aki.

Den RvA su afan pa skucha komunidad, a organisá dia 7 novèmber 2018 en koperashon ku University of Curaçao Dr. Moises da Costa Gomez un debate públiko riba dos tópiko di aktualidat 'instrukshonnan i e derecho di disolushon' pa halsa e konosementu di nan mas. Por lesa un e-book riba esaki riba website di RvA (www.raadvanadvies.cw). Den e relato anual nobo a bai mas profundo den e tema di 'konflikto di interes' pa stimulá diskushon den komunidad riba asuntunan di aktualidat.

E aparensia so kaba

Den un komunidad manera esun di Kòrsou fásilmente ta surgi e riesgo di konflikto di interes, pasobra den mayoria kaso hende ta aktivo riba múltiple tereno. Esei ta konta pa hende for di sektor públiko, e sektor privá i organisashonnan sosial. No nesesariamente mester tin problema di integridat, pero e peliger pa situashonnan di konflikto por ta djis ei. Dentro di e aparato gubernamental tin regla pa funshonnan sekundario i aseptashon di regalo. Pa gobernante (públiko) ta konta mas ainda pa nan keda leu for di konflikto di interes, hasta si no semper por proba esei 100%. Pone aserka tambe ku e persepsion so di konflikto di interes por ta sufisiente pa preferiblemente no kombiná sierto puesto i funshon sekundario. Por sosodé ku e aparensia so por pisa mas ku un konflikto real di interes.

Segun Sybesma, mester desaroyá maneho pa prevení e (aparensia di) konflikto di interes. P'esei hopi be ya ta hinka prinsipionan básiko manera imparshalidat, konfiabilidat, koutela, servidumbre i integridat den kódigonan di kondukta. Por ehèmpel, pa



miembronan di RvA tin regla ku no por kombiná sierto otro funshon òf puesto pa garantisá puresa di funshonamentu di e Konseho. Señor Sybesma ta referí tambe na lei di integridat di (kandidato pa) minister ku ta inkluí interes i funshonnan ku no por kombiná. Finalmente, resientemente pais Kòrsou a bini ku un Kódigo General di Kondukta pa Amtenaar ku reglanan pa loke ta (aparensia di) konflikto di interes, (aparensia di) korupshon, uso di propiedatnan públiko, komportashon na trabou, uso di droga i di informashon, kon ta anda ku sivilnan, ku miembronan di gobièrnu i ámtenarnan, i ademas kon ta kumpli ku e mesun kódigo di kondukta aki. Aki e plan di gobièrnu pa instalá un Ofisina di Integridat ta kuadra alabes.

Tur kos ta dependé kon ta kumpli ku e reglanan. Na mes momento señor Sybesma ta advertí kontra aplikashon demasiado rígido di e reglanan den un komunidad chikí ku ya tin relativamente poko ekspertisio, sino esei ta difikultá pa e komunidad kuminsá floresé atrobe. Den esaki un aparensia di konflikto di interes no ta sufisiente. Huntu mester para ketu na e punto si un konstatashon asina tin sufisiente base pa disidí ku e no ta nada mas ku aparensia, o sea ku realmente e ta kondusí na e konklushon di konstatá ku tin un konflikto di interes. E ora ei e mihó salida ta un sistema di 'checks & balances'.

Eksplotashon

Durante e aña di e relato, RvA mes a tene 24 reunion plenario, ku un promedio haltu di asistensia di 96,2%. Ademas, a reuní na total 10 biaha den e gruponan di trabou, miéntas ku por a atendé asuntunan ménos kompliká tambe atraves di e-mail. Na 2 okashon tabatin un enkuentro di trabou ku Gobernador, den su kalidat di presidente di RvA.

Masha spesial tabata dia 2 di yüli 2018 e enkuentro di e visepresidente ku e Pareha Real na palasio di Gobernador. Ademas RvA a topa ku Raad van State (di Hulanda) i e Konsehonan di Konsulta di Aruba i Sint Maarten, e Kolegio di supervishon finansiero (Cft) pa Kòrsou i Sint Maarten, Minister Presidente alabes Minister di Asuntunan General di Kòrsou, e Ministerionan di Finansa i di VVRP di Kòrsou, e Representante di Hulanda pa Aruba, Kòrsou i Sint Maarten, i Think to Do Institute.

Pa stimulá transparensia den un estado di derecho demokrátiko, e Konseho a publiká e konsehonan ku el a saka i ku ta públiko riba su website (www.raadvanadvies.cw).

Relato anual di 2018 riba website

Por lesa e relato anual di 2018 riba e website di RvA: www.raadvanadvies.cw.

Willemstad, 19 di yüni 2019

Na nòmber di visepresidente di Konseho di Konsulta,

señora mr. C.M. Raphaëla

Sekretario